

## **1999ko ABENDUAREN 18ko BILKURA BEREZIA**

Lizartzan, mila bederatziehun eta laurogeita hemeretziko abenduaren hemezortzian, eguerdiko hamabit'erdia direnean, Alkatea: Jose Antonio Mintegi Arrate; Udalkideak: Ana Ederra Irurzun, Antton Balerdi Garmendia, Nerea Altuna Zubeldia, Lurdes Altuna Arritegi, Lontxo Goikoetxeaundia Martinez; Koldo Alaña Zinegotzia, preso dagoenez, eta bilkurara etortzeko baimenik eman ez diotenez, ez da agertu; Idazkaria: Ana Jesus Zabala Garmendia eta beste hainbat herritar, Biltzar Berezian bildu dira, gai hau erabili delarik:

### **1.- UDALBILTZAN, LIZARTZAKO UDALAREN SARRERA**

#### **UDALBILTZAREN SORKUNTZA ETA HELBURUEKIKO ATXIKIPEN-MOZIO POLITIKOA**

Euskal Herriko 21 alkatek deiturik, 660 alkate eta zinegotzi bildu ziren Iruñan, iragan otsailaren 6ean. Deialdiaren helburu eta bileraren xedea argi eta garbi agertzen ziren han bertan egindako aldarrikapenean: "Lapurdi, Zuberoa, Nafarroa, Araba, Bizkaia eta Gipuzkoako alkate eta zinegotziak Iruñan elkartu gara gaur, erabat demokratikoa den ekitaldi bat burutzeko. Gure ordezkaritza eta lan-esparrutik, hau da, marko juridiko-politiko ezberdinetatik abiatu sei herrialdeetako euskaldunen harremanak legitimoki bultzatu nahi ditugu. Hori dela eta, Euskal Herriko udal hautetsiok udal izaeran oinarritutako euskal instituzio nazionala eraikitzeke nahia adierazten dugu."

Jarraian, sortu asmo zen erakunde nazionalaren helburu eta egitekoak izendatzen zituen Iruñan irakurritako agiriak:

- 1.- Euskal Herria nazio bat dela aldarrikatzea.
- 2.- Euskal Herriaren egituraketa politikoa eraikitzeari laguntza ematea. Euskal Herriaren nazio eraikuntza bultzatzea, prozesu dinamiko eta demokratiko

gisa ulerturik eta euskal herritar guztien erabakimen eta partehartze askean oinarriturik.

- 3.- Erakunde iraunkorra izateko asmoarekin jaio, borondateak pilatu eta batzeko sortua da eta ez du, ordea, beste erakunde batean bihurtzeko asmorik. Euskal Herriko antolakuntza instituzional zein politikoaren aztertze eta eztabaida aztertze.
- 4.- Herrialde guztietako udalerrien arteko harremanak eraikitzen laguntzeko. Euskal Herriari buruzko diagnostiko oinarritzkoa egingo da lehendabizi; geroago, nazio eraikuntzaren arazo eta erronka erkideei modu bateratu batean aurre egiteko.
- 5.- Euskal Herria nazio berezkoa eta ezberdindua dela nazio artean aldarrikatzea eta Nazio gisa jardun nahi duela Europako geroko egituraketan.

Aho batez onartua izan zen Iruñan udal izaeran oinarritutako erakunde nazionala sortzeko proposamena; alegia, arestian zehaztutako 5 helburu horiek aurrera eramaten ahaleginduko den erakundea. Asmo hori ahalbideratzeko, gisa horretako erakunde baten prestaketa lanak burutzeko, 10 Kideko Batzorde bat aukeratu zen, aldi berean Iruñako bilkuran.

Beraz, han onartutako asmo politikoa, hau da, erakunde nazionala sortzeko mandatu eman zitzaion Batzorde iraunkorrari.

Ekaineko Udal hauteskundeen ondorengo aldaketak bideratu zirenean eta Iruñan aho batez hautatutako Batzordeak bere prestaketa lanak burutu zituenean, egin zuen bere deia, Irailaren 18an biltzartzeko.

Deialdiari erantzunez 1800 alkate eta zinegotzi inguru bildu ziren Bilboko Euskalduna Jauregian, arartean asmo bat baizik ez zen erakunde nazionala sortzeko. Lau izan ziren han hartutako erabakiak, banan banan bozkatuak. Gehiengo mardul eta zabal baten baiezkoa jaso zuten ondorengo erabakiek:

- 1.- Udal oinarria duen erakunde nazionala sortzen da.

2.- Euskal Herriko Udal eta Udal Hautetsien Biltzarra da bere izen osoa, baina erabilgarriago izan dadin eta nahasketak ekiditeko, UDALBILTZA bezala ezagutu, erabili eta aldarrikatuko da.

3.- Bost lantalde sortzea erabakitzen da.

3.1. Euskal Herriaren naziotasuna garatuko duen taldea.

3.2. Euskal Herriaren oinarrizko diagnostikoa egingo duen taldea.

3.3. Euskal Herria nazio bat dela nazioartean isladatzeko lantaldea.

3.4. Euskal Herriaren barne egituraketa instituzionala aztertu eta eztabaidatuko duen taldea.

3.5. Erakundearen beraren barne antolamendu eta funtzionamenduaz arduratuko den lan taldea.

5.- Batzorde iraunkor berriko 15 kide izendatu eta onartzen dira batzarrean.

Aurreko 4 proposamen horiek Biltzarraren erabaki bihurtu eta gero, beraz, erakunde berria sortu ondoren, adierazpen politiko baten bidez eman zion hasiera batzorde berriak bere ibilbideari:

“Iruñan aitortutako borondate politikoari jarraiki, lehen euskal erakunde nazionala sortu dugu, UDALBILTZA jaio da. Udalbiltzak Euskal Herriaren lurraldetasuna adierazten du, Udalbiltzak nazio moduan aritzeko aukera eskeintzen digu eta Udalbiltzak nazio bezala munduaren aurrean agertzeko era ematen digu.”

Lehendabizi oinarrizko diagnostikoari eta lantaldeak osatzeari ekingo zaio. Beste erakunde, elkarte eta egile ekonomiko-sozialekin, elkar lanean arituko da, atek zabalik dituela, borondatezko partehartzea eta auzolan giroan.

Eta horrela jarraitzen zuen Euskalduna Jauregiko aldarrikapenak: “Euskal udal-hautetsiak gara eta euskal nazioa aitortzen dugu. Euskal herritarrei eta udal ordezkari guztiei luzatzen diegu gure gonbidapena, Euskal Herriaren une historiko honetan parte har dezaten”.

Udal hautetsiak eta Udalek osatzen dugu UDALBILTZA. Udal hautetsiak eta Udalek babestu, indartu eta garatu behar dugu Udalbiltza, gure erakunde nazionala.

Udalbiltza bezalako erakundeak behar ditu Euskal Herriaren eraikuntza demokratikoak, auzolanean, borondatez eta denen partehartzez osatua eta egituratua, inungo inposaketa eta zatiketarik gabe.

Euskal Herriko Udalen arteko harremanak sakontzeko, senidekidetzan lan egiteko eta Euskal Herri osoaren alde aritzeko sortu da Udalbiltza.

Hau guztia kontutan izanik, Euskal Herritarrokeko udal taldeek Udalbatzarrari ondorengo erabakiak hartzea proposatzen diote:

- 1.- Udalbiltzaren helburuak, egitasmoak eta izatea bere egiten ditu LIZARTZAKo Udalak.
- 2.- Bertako kide izateko borondatea adierazten du bidebatez.
- 3.- Udal erabaki honen berri Udalbiltzari emango zaio.
- 4.- Komunikabideen bitartekoz herritarrei jakin araziko zaie.

Udalbiltzan, Lizartzako Udalaren sarrerako mozioa, aztertu, eztabaidatu eta bozkatu ondoren, aho batez onartua izan da.

Eta hitzegiteko beste gairik ez dagoenez, Alkateak, Batzarra amaitutzat eman du, eguerdiko ordu bata denean.